



Na osnovu člana 2.9. stav (1) tačka 17, a u vezi sa članom 10.16 Izbornog zakona Bosne i Hercegovine ("Službeni glasnik BiH", br. 23/01, 07/02, 09/02, 20/02, 25/02, 04/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08 i 32/10, 18/13 i 07/14), Centralna izborna komisija Bosne i Hercegovine je na 4. sjednici, održanoj 12.01.2015. godine, donijela

### **O D L U K U**

#### **o raspodjeli mandata delegatu iz reda bošnjačkog naroda u Dom naroda Parlamenta Federacije Bosne i Hercegovine**

**Mušović Sanelu**, neizabranom kandidatu sa kandidatske liste Kanlić Muradifa koji ima najviši količnik **devet (9,00)**, dodjeljuje se mandat u Dom naroda Parlamenta Federacije Bosne i Hercegovine iz reda bošnjačkog naroda.

### **O b r a z l o ž e n j e**

Odredbom člana 10.10 Izbornog zakona Bosne i Hercegovine propisano je da kantonalna zakonodavna tijela biraju 58 delegata u Dom naroda Parlamenta Federacije Bosne i Hercegovine, 17 iz reda bošnjačkog, 17 iz reda srpskog, 17 iz reda hrvatskog naroda i sedam iz reda ostalih.

Nakon provedenog prvog kruga izbora delegata u Dom naroda Parlamenta Federacije Bosne i Hercegovine i uvidom u odluke o utvrđenju rezultata posrednih izbora u prvom krugu izbora delegata iz reda bošnjačkog naroda, Centralna izborna komisija Bosne i Hercegovine je utvrdila da je izabrano ukupno 16 delegata iz reda bošnjačkog naroda u Dom naroda Parlamenta Federacije Bosne i Hercegovine od potrebnih 17, te da je jedno (1) mjesto ostalo nepopunjeno.

U skladu sa odredbom člana 10.16 stav (2) Izbornog zakona Bosne i Hercegovine, Centralna izborna komisija Bosne i Hercegovine vrši ponovnu raspodjelu mjesta koja se ne mogu popuniti iz jednog kantona, odmah po završetku prvog kruga izbora delegata u Dom naroda Parlamenta Federacije Bosne i Hercegovine u svim kantonima.

Isto tako, Centralna izborna komisija Bosne i Hercegovine vrši preraspodjelu tog mjesta neizabranom kandidatu koji ima najviši količnik na svim listama koje se kandidiraju za odgovarajući konstitutivni narod ili za grupu ostalih u svim kantonima.

U postupku izbora delegata u Dom naroda Parlamenta Federacije Bosne i Hercegovine, Centralna izborna komisija BiH ovjerila je za izbor delegata iz reda bošnjačkog naroda 36 kandidatskih listi iz svih kantona. Uvidom u rezultate posrednih izbora iz svih kantona, broj glasova koje su osvojile kandidatske liste, te neizabrane kandidate sa najvišim količnikom utvrđeno je da kandidatska lista Kanlić Muradifa iz Bosansko-podrinjskog kantona Goražde-Kanton 5 ima neizabranog kandidata Mušović Sanela sa najvišim količnikom devet (9.00).

Imajući u vidu naprijed navedeno i činjenicu da su ispunjeni svi zakonski uslovi za ponovnu raspodjelu mandata, Centralna izborna komisija Bosne i Hercegovine je, u skladu sa članom 2.9 stav (1) tačka 17, a u vezi sa članom 10.16 Izbornog zakona Bosne i Hercegovine, odlučila kao u dispozitivu ove odluke.

Ova odluka stupa na snagu danom donošenja i objavit će se 12.01.2015. godine u 17 sati na web stranici Centralne izborne komisije Bosne i Hercegovine [www.izbori.ba](http://www.izbori.ba), i smatrat će se da je danom objavljivanja ista dostavljena svim učesnicima u posrednim izborima.

**PRAVNA POUKA:** Protiv ove odluke, u skladu sa članom 6.9 stav (1) i (2) Izbornog zakona Bosne i Hercegovine, može se podnijeti žalba Apelacionom odjelu Suda Bosne i Hercegovine u roku od dva dana od dana objavljivanja ove odluke.

Žalba se podnosi preko Centralne izborne komisije BiH i dostavlja se putem faks aparata na broj 033/251-329 ili neposredno u sjedište Centralne izborne komisije BiH, Ulica Danijela Ozme broj 7, Sarajevo.

Broj: 06-1-07-1-15/15  
Sarajevo, 12.01.2015. godine

Dostaviti:

1. Skupštinama kantona
2. a/a

